

Li Laus



**JEAN MARC
COURBET**



Reinié MARTEL
Felibre Majourau

LAUS
DE
JEAN MARC
COURBET
(1947 – 2016)

Cigalo de Zani

**Santo Estello de Brageirac
2018**

CIGALO DE ZANI

1876

Théodore AUBANEL
(1829 – 1886)

1887

Louis ASTRUC
(1857 – 1904)

1904

Jules RONJAT
(1864 – 1925)

1925

Fernand CLEMENT
(1877 – 1957)

1958

Pierre MILLET
(1913 – 1998)

1999

Jean Marc COURBET
(1947 – 2016)

2017

René MARTEL
(1957 -

Segne Capoulié, gènto Rèino,
Caro Silvò Courbet,
Car counfraire,
Cars ami felibre, cars ami,

Voudriéu avans touto causo gramacia aquéli que m'an permés d'estre aqui
vuei davans vous pèr lou laus de neste ami Jan-Marc Courbet. Gramaci
dounc à ma meirino Glaudeto Occelli-Sadaillan, assessor de Prouvènço,
à Miquèu Samouillan neste ami dóu Perigord, e gramaci à moun ami,
coumpan e fraire de toujour, Miquèu Benedetto.

Gramaci segne Capoulié e gramaci à vous majorau que m'avès aculi en
Counsistòri à la Santo-Estello de Bagnèro-de-Bigorro.

Gramaci peréu à Silvò pèr soun ajudo dins la creacioun d'aquest laus.

Es pèr iéu, enfant de la mountagno, enfant de la Valèia de l'Ubaia un
ounour qu'es pas de dire de me trouba aqui pèr rèndre oumenage à l'ome
qu'ai couneigu, aprecia e emé quau partejère souvènti-fes lou même biais
de pensa.

Reçaupre la Cigalo de Zani à sa seguido es de-segur un ounour, mai jamai
poudrai èstre o faire coume Jan-Marc.

Aquelo cigalo a adeja agu avans Jan-Marc de davancié de trío.
Fuguè pourtado à la debuto pèr un di tres mai impourtant primadié:
Teoudor Aubanel.

Aquel ome neissu en 1829 anavo counèisse en 1850 uno fiho, bello demié
li bello, Jenny Manivet, ié disien Zani. L'amavo – acò's de causo
qu'arrivon i jouvenas – mai Zani se faguè mounjo e jamai Teoudor
pousquè ié dire soun amour. Descounsoula, dounè lou noum de Zani sa
bèn amado à sa cigalo.

A sa despartido en 1886, es Louis Astruc, autre pouèto e ome de teatre
marsihés que la pourtè.

Jùli Rounjat lou gramatician d'elèi prenguè la seguido.

Lou Toulounen Fernand Clément pourtè pièi la Cigalo de Zani e à sa
mort, es Pèire Millet, óuriginàri de Cadarosso proche d'Aurenjo, que
l'aguè avans que Jan-Marc n'en devèngue éu-même lou titulàri.

Jan-Marc! Aguère l'ounour e lou plasé de lou counèisse. Se rescountravian dins lis annado 2000 qu'èro déjà un persounage incourtournable dóu Felibrige, mai li proumié cop que se parlerian pèr de bon èro à-z-Ais, à l'Oustau de Prouvènço, pèr li reünioun que seguiguèron li manifestacioun d'Anem'O. Aquéli manifestacioun fuguèron de succès e pèr countinua neste pres-fa, d'acamp dóu Felibrige emé l'IEO e l'AELOC se tenguèron, erian en 2010. Jan-Marc e Bernat Giely i'anavon, quant à ieu, souto-sendi dis Aup, representave la Mantenènço de Prouvènço s'un cop neste sendi, lou majourau Miquèu Benedetto, empacha lou dimècre de-matin, poudié pas i'estre.

Jan-Marc, sa vido

Jan-Marc es neissu à Camaret-sus-Eigo lou 26 de juliet 1947. Si gènt èron païsan e touto sa vido gardara la sano e vertadiero marco d'aquéu que counèis la vido pacano, que counèis la terro e si valour. Sa maire me disié que touto soun enfanço èro esta pivela pèr la couneissènço, pèr la descuberto e la coumprenesoun dóu mounde. Ero toujour en cerco de coumprendre, d'apprendre e lou mitan mounte èro neissu ié permetié acò. Si gènt simple coume forçò pacan èron pamens toujour vira vers l'aveni, en bousco d'un mounde meiour pèr sis enfant.

Touto sa jouinesso fuguè bressado pèr la lengo que se parlavo alor dins li village: lou prouvençau. Si grand la parlavon e dins li carriero di village se poudié encaro entendre nosto lengo.

Jan-Marc avié la crespino de legi dins lou journau regiounau li crounico semaniero de Pau Marquion.

Faguè sis estudi primàri à Camaret, pièi lou mandèron au licèu d'Aurenjo. Es d'aiours eila que faguè la couneissènço de Pèire Millet que sara soun davancié sus la Cigalo de Zani.

Estudiè pièi la chimio dins la regioun parisenco e daverè un Brevet de Teiniclan Superiour en 1965 à Saint-Maur-des-Fossés en Vau-de-Marno. Dous an de tems travaiara au Cèntre Nucleàri de Sarclay.

Es à Paris que rescountré dins l'encastre d'un councous de fotò Silvìo, uno chato de Nourmandiò que devendra sa femo.

En 1970, faguè soun tèms de sourdat dins la couóuperacioun en Africo coume proufessour de matematico. Restè dos annado à Douala au Cameroun.

Aquel aluenchamen à Paris d'abord pièi en Africo lou rendra que mai afouga pèr Prouvènço, pèr nosto lengo e nosto culturo.

A soun retour, travaiè à Bouleno dins uno fabrico de coumpausant eleitrouni.

E rintrè pièi à Marcoulo, gaire liuen de Bouleno, pèr oubra dins la vitrificacioun di laisso di centralo nucleàri coume engeniaire chimisto à la COGEMA.

Se maridè en 1972 emé Silvò que ié dounara dos poulli chato: Elisabèu que rèsto en Alemagno e qu'a un drole e uno chato, e Magalouno qu'es elo dòu coustat de Toulouso e qu'a peréu un drole e uno chato.

Silvò toustèms l'acoumpagnè dins soun pres-fa prouvençau, i'adusènt soustèn em' encourajamen dins tout ço que fasié pèr nosto lengo, nosto culturo. Fuguè tras-qu'impourtanto dins sa vido, dins soun acioune. Se dis que darrié chasque grand ome s'escound uno femo de valour e pènse que Silvò jouguè un role majourau dins tout ço que faguè Jan-Marc, dins tout ço que Jan-Marc dounè.

Sa famiho coumtavo forço pèr Jan-Marc. S'óucupavo de sa maire Regino, uno femo de la terro qu 'avié toujour permés à Jan-Marc de s'estruire e de se basti.

Avié peréu uno sorre, Mounico, qu'es toujour dins lou mitan prouvençau. Mestresso d'obro dòu Felibrige, beilejo uno assouciacioun prouvençalo à Camaret, e fai de teatre.

Soun fraire èro tambèn pasta dins la culturo e dins l'aparamen dòu patrimòni dins soun village.

Mai, dirai que tóuti lis autre èron tambèn impourtant pèr aquel ome e dins lis annado vuechanto, Jan-Marc e Silvò tenien de poste de secours pèr la *Croix-Rouge*, en secouristo coumpli e diplouma.

Avié uno passioun pèr la foutougrafia que partejavo emé sa gènto mouié. A fa quaucarèn coume 15 à 20 000 fotò, e majamen sus mant un sujet toucant la Prouvènço. Quau l'a jamai vist dins nòstis acamp, soun aparèi-foutougrafi en bricolo? Quau s'es jamai coundousta de si fotò?

Ero tambèn un passiouna de filatelìo. Coumencè de couleita li timbre dóu mounde entié tre si 15 an, e souvènti-fes presentavo dins sis article de prèisso li timbre nouvèu que venien d'espeli.

Mai èro tambèn amatour de bono taulo, de bon vin, de choucoulat negre e de cafè. Es pas pèr rèn que li gènt de Camaret an pèr faus-noum "Li Manjo-tian de luserno".

I'agradavo forço de proumena en motò.

Ero tambèn afouga de teatre e Cesar Choisy èro de sis ami.

Enfant, voulié èstre piloto de casso, mai sa marrido visto l'engardè de coumpli soun pantai. Acò l'empachè pamens pas de treva chasque an emé Silvio li saloun aerounauti e soun rescontre emé Andriéu Turcat, pilot dóu Concorde, fuguè pèr éu un moumen marcant.

I'agradavo la velo e amavo proun d'ana en mar, uno mar bluio trevado d'ivèr quoouro i'a pas tant de mounde; trevavo tambèn la mountagno, d'estiéu, que tout i'es mai tranquile.

E sa culturo èro richo.

Amatour de musico classico: Bach, Beethoven, Vivaldi, Paganini...

Amavo forço legi: biougrafia, rouman fantasti, sciènci-ficioùn, libre tratant d'esouterisme... sa biblioutèco èro drudo de tóuti li gràndis obro dis escrivan, que fugon classi o moulderne.

Mai sa pus grossu afecioun anavo à la lengo e la culturo nostro.

Jan-Marc, soun obro

Es aquelo afecioun qu'en 1977 lou fai rejougue lou mouvamen Parlaren ounte fai couneissènço de dous ome que devendran si grands ami: Brunoun Eyrier, de Vilo-Novo d'Avignoun e Bernat Giely.

En 1978, endraia pèr Brunoun Eyrier, crèè Parlaren à Bouleno que beilejara trento-vuech an de tèms. Ansin fai soun proun pèr que visque la lengo e la culturo prouvençalo dins soun relarg.

Menè tre la debuto de soun istalacioun à Bouleno un couss de prouvençau. Soun idèio proumiero èro d'ourganisa uno pichoto biblioutèco à destinacioun de sis escoulan. Mai, lou sabès, à cha sòu lis escut se fan, e lèu se metè en tèsto de rassembla peréu touto meno d'oubrage en prouvençau. Vai ansin qu' emé l'ajudo de si coumpañ de Parlaren e de la vilo de Bouleno, la « pichoto biblioutèco » venguè en 1982 un **Cèntr de Doucumentacioun Prouvençalo**.



Pas mai! Aquest cèntr troubara sa plaço en 1984 dins un vièi oustau dóu siècle dès-e-seten, l'Hôtel d'Antremont, mes à dispousicioun pèr la coumuno de Bouleno. Parlaren n'a la gestioun despièi la debuto.

Lou founs es esta integra dins lis archiéu municipau que lou volon perenisa. Es vuei óuficialamen recouneigu pèr lou Cèntr Regiounau de Doucumentacioun Pedagogico qu'apellon Canopé, pèr la Direicioun Regiounalo dis Afaire Culturau, lou Counsèu Regiounau e lis Archiéu Despartamentau.

Recampè pau à cha pau un abounde de libre que tocon l'istòri, la geografio, la geoulougio, li tradicioun, la literaturo, l'agriculturo, lou tourisme... basto, tout ço qu'interèssso Prouvènço... E pèr cadun d'aquéli libre faguè uno presentacioun, un pichot resumit, travai de beneditin... Vuei soun à la consultacioun mai de 5130 libre! I'a d'oubrage di siècle 15en au siècle 21en, quouro en prouvençau, quouro bi-lengo, quouro en francés. D'ùni que i'a soun en lengo estrangiero. E vous parle pas di manuscri jamai publica...

Ié troubarés tambèn un mouloun d'article, de tros de revisto, de taioun de journau sus tout ço que toco Prouvènço, sa lengo, sa culturo; ansin, 120

000 manlèu de presso e papié divers soun repertouria e classa pèr tèmo, memòri vertadiero de Prouvènço.

De caièr doucumentari escri en maje part pèr Jan-Marc soun esta fa: *Li tradicioun calendalo*, *Lou baile Suffren*, *Li tradicioun de Caramentran*, *Micoulau Saboly*, *Frederi Mistral e soun obro*, *Lis aucèu en Prouvènço*, *La Coupo Santo...*

I'a peréu 540 titre de perioudi, tant vau dire mai de 5000 numerò de journau o revisto.

Lou cèntre rejoun tambèn mai de 4000 fotò; uno sounoutèco recampo 890 doucumen sounò o videò (disque negre, disque sarra, queisseto) e de doucumen óuriginau inedi; 570 aficho de fèsto o espetacle prouvençau de tutto Prouvènço soun à descurbi.

Jan-Marc mountè peréu d'espousicioun que lou cèntre vous pòu presta clau en man : i'a que de penja li panèu. Avès ansin *La literaturo prouvençalo*; *Pau Marquion ome de tiatre e felibre*; *La vigno e lou vin en Costo-de-Rose* ; *Li fedo e l'amountagnage*; *Frederi Mistral, sa vido e soun obro*; *L'argielo refratàri de Bouleno*; *L'aigo en Prouvènço*; *L'istòri de Prouvènço...*

Li demando de rensignamen soun forçò noumbrouso e lou cèntre es vuei devengu un vertadié "cèntre de ressourço" que se pòu trouba sus la telo: "www.documprovence.com".

Se pòu fountocoupia, escanerisa. « *Qu a besoun d'un rensignamen a ço que vòu dins li cinq minuto !* » afourtissié Jan-Marc. I'a quàuqui mes, mai de 2500 demando de rensignamen èron estado reçaupudo.

Aquéli demando avènon d'en pertout, de la regioun de Bouleno de-segur, dis àutri cantoun de Prouvènço mai tambèn de tutto la Franço e même di païs fourestié.

Es tout naturalemen qu'en setèembre de 2017 desbatejeron lou Cèntre de Doucumentacioun Prouvençalo pèr l'apela: "Cèntre Jan-Marc Courbet".

Uno obro ansin poudrié adeja basta pèr dire coume l'ome a travaia. Mai sian enca liuen dóu comte. Jujas-n'en:

- En 1982, èro di foundedou de Parlaren en Vaucluso. N'en fuguè pièi lou souto-presidènt en jusquo 2002 e meme lou presidènt dins lis annado 1987-1989.
- Sèt an après, fuguè de la colo que creè la revisto dis assouciacioun Parlaren, e es éu que n'en prepausè lou titre: "Li Nouvello de Prouvènço". N'en restè uno bono deseno d'an membre dóu coumitat de redacioun.

Prenguè sa bono part dins la reneissènço dóu Festenau Prouvençau dóu Palais dóu Roure d'Avignoun e arribè de l'alarga dins tout lou Païs de Vaucluso.

Fuguè un soustèn fidèu de la ditado regiounalo de Parlaren Bedarrido e un juge atentiéu dóu councous "Ramoun Favier" de l'article de prèsso di Nouvelo de Prouvènço. Fuguè tambèn dins la jurado de l'eisamen dóu bacheleirat.

– Tenguè e mantenguè forço fèsto prouvençalo dins soun relarg, en particulié li fèsto prouvençalo tradiciounal de Bouleno ourganisado pèr Parlaren e Li Cardelino.

Ourganisé meme en 1993 lou Grand prèmi de la cansoun prouvençalo à Bouleno que fuguè un grand succès.

Revièudè l'Escolo di Lavando de Mount-Segur sus Lauzoun e l'Escolo Marius André de Santo-Cèio li Vigno.

Mai voulié sobre-tout coumunicà.

Mestrejavo bèn l'escrituro en lengo nostro, e lèu, coumencè de manda d'article de prèsso. E calara jamai, coume lou disié: *"Siéu perfetamen counsciènt qu'ai pas lou biais pèr escriéure de belli causo, e aqui es pas de fausso moudestò de ma part. Noun, es ansin, que voulès, urous que siguessian pas pasta dóu meme biais e coula dins lou meme mole, s'erian tóuti parié, sarié bèn triste e lou mounde bèn gris. Adounc ai forço escri, e se Diéu me prèsto encaro quàquis annado, countinuarai d'escriéure coume avans. Me siéu toujour pensa que me falié escriéure, noun pas pèr*


moun plesi, pas même pèr lou plesi di legèire, mai simplamen pèr faire counèisse de causo is autre, pèr parteja emé de legèire ço qu'aviéu après, ço qu'aviéu legi, ço qu'aviéu vist."

Ansin, d'annado de tems, faguè d'article pèr "Prouvènço Dau", pièi pèr "Prouvènço d'Aro" e tambèn pèr "Li Nouvello de Prouvènço". Presentè ansin forçò libre, CD, o prouducioun. Escriguè sus mant'un sujet diversifica.

Avié pas crento dóu franc-valentin o d'abourda li sujet tihous: ansin, faguè d'article en 1985 sus l'autodeterminacioun, article bateja "Nàutri li coulounisa".

En 1990, maugrat li garrouio entre óucitan e prouvençalisto, escriguè un article sus Roubert Lafont entitoula "Roubert Lafont, mai mistralen qu'eu mores"... e un autre article toujour sus l'autodeterminacioun mounte escriguè "Vesés pas qu'un d'aquésti jour lou Counsèu Regiounau de Prouvènço voutèsse uno proupousicioun afiermant lou dre à l'autodeterminacioun pèr lou pople prouvençau... Ça qu'es un dre pèr d'uni pople, perqué lou sarié pas pèr d'autre?..."

Soun gàubi d'escrivan ié permeteguè peréu d'escriéure un proumié libre: "Proujèt Frederi" guierdouna pèr la jurado di Jo flourau de la Santo-Estello Nimesenco de 1990. Aquest libre, un rouman poulicié d'espionnage dins lou mitan nucleàri que counèis bèn, pareira en fuietoun dins Prouvènço Dau, avans de se vèire edita.



Jan-Marc revirè encaro en prouvençau un libre de sa maire "La cousino de Memèi Regino", is edicioun de "Prouvènço d'Aro" un recuei de recèto que faguè mirando.

Faguè – lou veiren un pau mai liuen – un libre en seguido dóu viage di felibre en terro catalano: "Prouvènço e Catalougno", èro en 2008.

Faguè edita en 2013 l'autobiografio de soun davancié Pèire Millet : "I raro de l'estiéu" que l'autour i'avié fisa.

Sa voulounta d'escriéure, de coumunicar se vèi enca dins li nouembròusi reviraduro que faguè coume li peço de tiatre escricho en catalan de Jaume Llong : *Bertino, Dono Bertino fai soun partage, Lou cabanoun de la fadado, Jamai de la vido.*

Anè tambèn forço escriéure sus soun escrivan favourit Jan-Enri Fabre e escriguè de prefàci coume la de "Hymnes et chants identitaires du grand Sud" de Martino Boudet e quauqui biougrafio: Mistral, D'Arbaud, Mario Mauron.

Participè au libre: "Balade en Provence, sur les pas des écrivains"

En 2015, faguè tambèn la prefàci de "Rajado d'escrituro" un libre publica pèr lis edicioun de Prouvènço d'Aro, libre que repren lis article de la man de Mistral dins lou journau "L'Aiòli".

Lis edicioun dóu CREDDO publiquèron aquesto memo annado un recuei: "Escrivan d'encuei" e Jan-Marc de-segur ié troubè sa bello plaço.

En 2016, revirè un libre de Rabindranath Tagore, prèmi Nobel de literaturo en 1913, grand escrivan, pintre e filosofe indian. Aquest libre es "L'Ouferto lirico", reviraduro bello mai-que-mai, basado sus la trascricioun francesa d'Andriéu Gide e que sara publicado pèr la Mantenènço de Prouvènço. Fuguè uno de si darriéris obro d'impourtanço, un de si darrié bonur.

Emé Jan-Pèire Banet creè un CD d'apprentissage de la lengo d'O: "Iniciacioun au prouvençau roudanen moudarne".



Pas proun d'escriéure e de baia de couss de prouvençau, vouguè parteja si couneissènço en dounant de counferènci. La proumiero fuguè largado lou 23 de mai 1980 sus *La vido e l'obro de Mistral*.

Si counferènci vous avien d'acò dru, recerca, travaia, passiouna que vous prenien. Sabié pivela soun auditòri e èro un chale de l'escouta.

Anè jusco dins lou mejor d'Italò pèr douna uno counferènci – en prouvençau se vous fai pas mai! sus nòsti tradicioun e en particulié sus Caramentran.

Coume la coumunicacioun èro pèr éu tras-qu'impourtanto, utilisè tambèn la prèisso audio-visualo.

En 1981, Jan-Marc coumencè d'anima d'emissioun de radiò en lengo nostro sus uno radiò liéuro de la Droumo, Radio-Mistral.

Assegurè peréu d'emissioun reguliero de radiò toucant la culturo prouvençalo sus Radio-Ecclesia, uno radiò beilejado pèr lou dioucèsi de Nime qu'avié d'estudiò au Sant-Esperit (Pont-saint-Esprit) pas liuen de Bouleno.

Enregistrà emé Radio-Ecclesia un proumié CD: "Les papes d'Avignon" e quàuquis annado mai tard, soun tres CD de sis emissioun que fuguèron publica. Emé l'entrèvo d'Eleno Sauvignon, Jan-Marc parlè ansin de "Frederi Mistral, un ome, uno vido".

Coumpañ de Jan-Pèire Belmon, participè en de nouembròusis emissioun de televisioun.

Mai Jan-Marc èro tambèn un coumbatènt e participè à forço manifestacioun.

Emé li sòci de Parlaren Bouleno, èro à Marsiho en 1982 pèr la proumiero di gràndi manifestacioun de carriero pèr la recouneissènço de nosto lengo e sa plaço à la televisioun, ourganisado pèr Parlaren soutu la beilié de Bernat Giely.

En 1983, èro emé li Boulenen presènt à Mount-Pelié pèr uno manifestacioun pèr sauva la lengo.

En 1984, toujour emé lou president de Parlaren Bernat Giely, fuguè à Estrasburg counvida au Counsèu de l'Europo pèr la preparacioun de la Charto éeuropenco di lengo regionalo e minoritari en Europo, e intervenguè pèr *demande que li panèu de signalisacioun fuguèsson escri*

en prouvençau e plus en dialèite parisen, un qualificatiéu de la lengo franceso que rabaiè forço aplaudimen.

Quàuquis annado après, Jan-Marc participè à la manifestacioun pèr la signaturo de la charto éeuropenco di lengo regiounalo que se debanè à Marsiho.

Ero peréu à Beziés en 2007 pèr la manifestacioun "Anen O ! Pèr la lengo d'O" que recampè de milié de felibre vengu de tóuti li païs miejournau.

En 2009, fuguè demié li representant di lengo regiounalo que se retroubèron à l'Assemblado Naciounalo pèr rescountra li membre de l'intergroup parlamentàri carga di lengo regiounalo.

Diguè: *Uno soulucioun souleto pèr óuteni lou mai pouossible: d'uno part, moustra que li lengo territorial de Franço soun unido e de dous, en particulié dins nòsti païs d'O moustra que marchan tóuti courtriò pèr li dre de nosto rebello lengo d'O; acò lou faren à bèus iue vesènt lou 24 d'óutobre, à l'óucasioun de la manifestacioun "Anen O!" à Carcassouno".*

Ramentaren simplamen que 25000 persouno èron presènto dins li carriero de Carcassouno aquéu jour d'aqui.

Pèr Anem'o, Jan-Marc representè lou Felibrige de 2007 enjusqu'à 2012. A Paris en mai 2013, manifestè davans l'UNESCO, emé Bernat Giely demié de centenau de delegat dis assouciacioun de defènso di lengo regiounalo de Franço, pèr denouncia à la faço dóu mounde lou massacre lenguisti perpetra pèr l'estat francés.

Fuguè de tóuti li lucho.

Mai Jan-Marc èro sobre-tout un grand felibre.

Fuguè peirineja en 1990 pèr soun vièti ami lou majourau Bernat Giely. Countinuè soun pres-fa d'aparaire de nosto lengo, nosto culturo tant coume sòci de Parlaren que coume felibre afouga.

En 1998, soun rère-proufessour lou majourau Pèire Millet defuntè. Naturalamen, counsidera pèr Millet coume soun fihòu, fuguè presenta au majouralat pèr Bernat Giely, Jaque Mouttet e Jan Fourié. Fuguè elegi en

1999 majourau dóu Felibrige, à la Santo-Estello de Grasso e devenguè l'eiretié de soun ancian proufessour en pourtant fièr la Cigalo de Zani.

L'espingleudo se faguè à la fin de l'annado em'un fube de majourau.

Partènt d'aqui soun engajamen dins l'acioun felibrenco faguè que crèisse, mai cessè pas d'escriéure d'article dins "Prouvènço d'Aro" sobre-tout pèr presenta e faire d'elogie sus li cantaire e musician nostre.

Ero presènt dins tòuti li manifestacioun felibrenco, dins tòuti lis acamp. Countinuè si counferènci, sis emissioun, sa couumunicacioun pèr faire valé lou Felibrige e li pensado de Mistral.

Ero ansin presènt en febrié 2000 à-z-Ais pèr l'inaguracioun dóu Col'Oc e prenguè la paraulo pèr assegura que "*l'acculturo americano, vertadiero usino pèr fabrica de souto-culturo de pacoutiho soutu la bèn-voulènci dóu Diéu dollar, finis pèr asfissia li culturo veraio. Aquelo marèio negro que ié dison pudicamen "la moundialisacioun", es en trin de larga uno fausso identita dicho gloubalo, destilado pèr tòuti li canau e que, en realita, n'es qu'un pur proudu coumerciau. Aquéu proucessus bassamen mercantile trasformo tant lis ome coume li pople en marchandiso, e se desveloupo coume un "virus planetàri": devèn adounc, d'en pertout e autant que se posque "proudurre de contro-virus". Se fau despacha avans que tòuti li testimòni culturau agon despareigu"*

En 2006, Jaque Mouttet elegi Capoulié chausiguè Jan-Marc pèr baile dóu Felibrige. Se dounè tout entié dins aquesto founacioun nouvello.


Trawaiè em'estrambord e tenesoun pèr assegura aquéu grandaras pres-fa. Fuguè d'en pertout pèr representar lou Felibrige, à chasque cop que lou falié.

Anè ansin participa à la respelido de la revisto dóu Felibrige e n'en fuguè lou gerènt.

Dounè en franchimand un pichot resumit d'aquele revisto que mandavo pièi à mai de 3000 persouno pèr mail. Faguè pèr lou meme biais passa lis enfournacioun que lou Felibrige souvetavo faire passa.

Pèr pas maucoura sa chourmo felibrenco, vouguè plus que soun noum figurèsse dins "Prouvènço d'Aro" que pamens noun poudié se n'en dessepara après tant d'annado de coulabouracioun. Alor, troubè l'escampo emé l'emplé d'inicialo o d'escais-noum. Es dounc "Liounèu de Volvent" que vai faire li critico di libre o de disque, Volvent estènt lou noum dóu vilage de si rière en Droumo prouvençalo.

Ajudè metre en plaço lou proujèt de soun ami Bernat Giely: "lou Counsèu de l'Escri Mistralen" que sa toco èro de garda à la grafio mistralenco touto sa moudernita.



Anè en Catalougno em'un centenau de felibre dins l'andano de Frederi Mistral en óutobre 2008, pèr refourtì li liame entre Prouvènço e Catalougno e adurre la Coupo Santo au rescontre de sa cousin germano catalano. D'aquéu viage tirara un libre en 2010, "Prouvènço e Catalougno" presenta coume un resumit de l'istòri d'uno freirejacioun entre Catalougno e Prouvènço.

En novèembre 2008 fuguè tambèn à Vielha en Vau-d'Aran pèr l'arribado di sèt caminaire parti de Vinai en Val Stura dins lou Piemount italian que fasien lou "Camin d'oc".

Touto sa vido faguè de grand viage, es ansin qu'es ana emé Silvìo d'en pertout en Europa, mai toujour emé dins la tèsto e dins lou cor la relacioun emé lou Felibrige: li souveni mistralen, o li rescontre emé de sòci.

Un grand moumen d'esmougudo nous fuguè douna en 2012, à la Santo-Estello de Sant-Iriès quand prenguè la paraulo pèr anouncia que devié èstre descarga de sa founciou de baile pèr causo de santa.

L'emoucioun èro tras-que forto e uno grando óuvacioun de tòuti li felibre dre dins la salo lou gramaciè.

Acò l'empachè pas de faire uno dichò pèr lou coulòqui sus Savié de Fourviero à Roubioun en 2012, o de participa au coulòqui dòu CREDD'O à Gravesoun en 2013 pèr parla de "Provence, Europe et Méditerranée".

En 2013, la jurado de Ventabren decernè lou grand prèmi literàri de Prouvènço à Jan-Marc. Jan-Glaude Bouvier dins sa dichò dira : *L'obro de Jan-Marc Courbet ei coumpausado de peço forço noumbrouso e diverso, mai qu'an entre éli uno unita, uno couërençì bèn claro. Dison tòuti uno voulounta militanto bèn tancado de liga estrechamen la lengo e la culturo prouvençalo pèr li viéure dins la soucieta de la Prouvènço d'aro e tambèn en deforo... Jan-Marc es sobre-tout un journalisto e animatour, li dous poudènt gaire èstre destria l'un de l'autre, endraia dins la proumoucioun de la lengo e de la culturo prouvençalo. Pèr acò emprego tutto uno armarié de mejan de couumunicacioun... Fin finalo, Jan-Marc Courbet es un ome de dialogue e de sintèsi couomo se n'en trobo gaire à l'ouro d'aro.*

Jan-Marc dins si gramaci lou prouvè encaro: "*Permetèrs-me de reprene la fraso istourico d'un grand ome: Fau un pantai, sus li colo prefumado e dins li drùdi plano de Prouvènço, me figure que tòuti lis aparaire sincère de nostro culturo e de nostro lengo se baiaran la man pèr apara la lengo dis Aup i Pirenèu, de la mar bluio à la mar verdo*".

E countinuè soun pres-fa maugrat li siuen medicaud segui à l'espitau de Mount-pelié.

Fuguè encaro presènt en d'evenimen ourganisa dins l'an 2014 pèr la counmemouracioun dòu centenàri de la despartido de Mistral.

Dounè en aquesto anniversàri un mouloun de counferènci e fuguè presènt en mant uno manifestacioun d'oumenage au grand mestre.

Countinuè pamens d'escriéure pèr Prouvènço d'Aro.

A travaia enjusqu'au bout de si forço, de sa vido, e quouro defuntè lou 6 de novèembre 2016, leissè un grand, un prefouns vide dins lou mounde prouvençau, dins lou Felibrige.

Lis oumenage sus éu, sa vido, sis idèio, sis acioun fuguèron tras-que noumbrous.

Tótutis aquéli que l'an couneissu, tótutis aquéli qu'an pouscu vèire sis acioun, soun èime prouvençau an garda d'éu un souveni recounèissent e esmougu.

JAN-MARC, l'ome

Tout ço que vène de dire sus Jan-Marc es déjà proun impourtant pèr defeni l'ome, es déjà uno inmense réussido, es déjà un testamen tras-qu'impourtant de ço que lèisso dins nosto memòri. Mai es peréu lou temouniage de ço qu'ero, lou temouniage d'un ome coume n'i a gaire.

Jan-Marc èro un travaiaire achini. Soun engajamen èro tant fort pèr nosto lengo, nosto culturo, pèr noste Felibrige que prenié se pòu dire la formo d'un vertadié sacerdòci.

Se poudrié parla d'iper-ativeta quouro vesèn tout ço que faguè. Ero d'efèt un tra de sa persounalita. En mai d'acò, sabié pas dire de noun en quau ié demandavo quaucarèn, en quau ié prepausavo de participa à talo o talo jurado, de courregi tau tête, à respondre à talo demando.

Ero, l'avèn vist, un "aparaire ferouge" de nosto lengo, de nosto culturo, un couombatènt afouga. Aquelo facieto de soun caratère la poudèn enca vèire dins sa vido vidanto.

Se tenguè belèu de mena uno carriero mai impourtanto dins sa vido proufessiounalo, tant talamen voulié resta en Prouvènço. Bataiè 'mé valentiso contro un proumié cancèr que lou grevavo avans ai! las, qu'uno recidivo venguèsse l'avalì.

Jan-Marc avié – causo raro! – un coustat scientifi pèr sa fourmacioun proufessiounalo, pèr sis estudi que l'avien mena à-n-uno auto qualificacioun dins lou nucleàri, mai tambèn un coustat literàri que se desvelo clar dins tout ço que fasié pèr nosto lengo, nosto culturo. Escrivie forçò, l'avèn vist, de resumit, de presentacioun, e de libre. Sabié faire passa pèr soun biais de parla tóuti si couneissènço, fuguèsse dins si cunferènci, dins sis emissioun de radiò o de televisioun.

Estaca i tradicioun, avié tambèn uno founso voulounta de s'assabenta de tóuti li teinico mouderno.

Ansin, fuguè sòci dóu group fóuclouri de Bouleno, Li Cardelino, faturavo soun jardin – qu'acò ié rapelavo soun jouvènt – e en paralèlo avié fa siéuno tóuti li teinico mouderno de coumunicacioun. Utilisavo la radiò, la televisioun, la telaragno e tout ço que la vido d'encuei nous met à dispousicioun.

Aquelo dicoutoumìo se retroubavo pèr eisèmple dins sis atiramen musicau.

Se i'agradavo la musico classico (Bach...), i'èro autambèn un plasé di grand d'escouta la musico d'un Jan-Miquèu Jarre o d'autri coumpositour mouderne, e li coumedìo musicalo coume "Hair"...

Anavo un pau parié pèr la pinturo: passiouna pèr lis obro de Vermeer, amavo peréu Bosch e si pinturo tempestouso.

Pèr éu, falié agué de racino founso, falié bèn saupre d'ouna venias, mai falié pas balança pèr evouluna, valènt-à-dire èstre tanca dins l'acioun mouderno emé lis elemen mouderne.

Ero un travaiaire achini, e tout ço qu'entreprenié lou marcavo d'uno voulounta duradisso de toujour douna lou meiour d'éu-même. Ansin,

quouro coumencè soun cous de prouvençau à Bouleno, tout à soun perfeiciounisme, faguè ni uno ni dous e se meteguè dins la bano de tourna à l'escolo pèr se merita lou titre de proufessour... e daverè lou diplomo d'Estudi Prouvençau Moulderne en 1981 à l'universita d'Avignoun! Ero d'aiours lou soulet diplomo que gardavo dins soun burèu...

Es un eisèmple de soun biais d'estre e de faire, de soun biais de toujour douna lou meiour de sa persouno.

Pèr éu, douna lou meiour de sa persouno anavo coutrò emé viéure dins un mounde toulerènt, bèn-voulènt, apasima, un mounde que li garrouio ié sarien pas uno maniero de founciouuna. Soufrissié pas de roumpre la gerlo emé quaucun. Li relacioun umano passavon tout pèr éu, avié uno forto persounalita mai li facharié poudien pas dura. Falié se dire li causo, de cop que i'a meme se disputa, mai aquéli disputo èron pas pèr vous desfaire en amista. Eisistavon, bèn entendu, mai partènt d'aqui falié basti quaucarèn d'autre, passa en dela de ço que nous desseparo pèr avera ço que nous ligo. Avié toujour l'envejo de cerca à avança emé lis autre, tóuti lis autre. Soun soucit d'unita, sa voulounta d'escouta l'autre, sa desiranço de durbi lou dialogue, acò èro soun biais de faire e d'estre.

Sa vesioun de l'acioun avié rèn de seitàri. Au contro, fuguè toujour l'ome de la cùnsentido, dóu dialogue, de l'unita.

Ansin e l'avèn vist mant un cop, Jan-Marc èro un ome saberu, perfeiciounisto, achini dins soun obro. A viscu soun amour pèr Prouvènço, à travès sa lengo, à travès sa culturo, coume un vertadié sacerdòci, de-longo vira vers lis autre.

Silvio disié que Prouvènço èro tutto sa vido.

E de-bon, èro sa resoun de viéure.

Fuguè l'egrègi majourau que vous ai di.

Leissara uno souvenènço forto e esmougudo. Longo-mai poudèn lou gramacia de ço qu'èro, de ço que dounè à nosto lengo, à noste èime, à nosto civilisacioun, au Felibrige e en cadun d'entre nautre!

Vous gramacìe.

Félibrige - texte original